

Bwrdd Taliadau Cynulliad Cenedlaethol Cymru

Cofnodion: WRB (17) 15 Chwefror 2013

Amser: 09.30 – 15.00

Lleoliad: Ystafell Gynadledda 4B

Aelodau'r Bwrdd

Y Gwir Anrhydeddus Syr George Reid (Cadeirydd)

Sandy Blair

Mary Carter

Stuart Castledine

Yr Athro Monojit Chatterji

Eraill

Adrian Crompton (Cyfarwyddwr Busnes y Cynulliad)

William Graham AC (Cadeirydd Ymddiriedolwyr Cynllun Pensiwn yr Aelodau) – eitem 2

Roger Beale (Rheolwr Cyllid) – eitem 2

John Chick (Pennaeth Cymorth Busnes i'r Aelodau) – eitemau 3 a 4

Dominic Houlihan (Rheolwr Gwasanaethau Cwsmeriaid) – eitemau 3 a 4

Staff Cymorth y Bwrdd:

Carys Eyton Evans, Clerc

Eitem 1: Cyflwyniad y Cadeirydd

1. Croesawodd y Cadeirydd y Bwrdd i'r ail gyfarfod ar bymtheg.

a) Cofnodion y cyfarfod blaenorol

Adolygwyd cofnodion y cyfarfod blaenorol, a gynhaliwyd ar 25 Ionawr, a chadarnhawyd eu bod yn gywir.

b) Datgan buddiannau

Aeth Stuart Castledine a Chlerc y Bwrdd i seminar ar bensiynau (a oedd yn cynnwys cyflwyniad gan yr Arglwydd Hutton). Cynhaliwyd y digwyddiad hwn gan Eversheds, sef y cwmni sy'n rhoi cyngor cyfreithiol i Ymddiriedolwyr Cynllun Pensiwn yr Aelodau.

Eitem 2: Pensiynau: Cais gan Ymddiriedolwyr Cynllun Pensiwn yr Aelodau i newid y rheolau

2. Cafodd y Bwrdd gais gan Gadeirydd Ymddiriedolwyr Cynllun Pensiwn yr Aelodau i newid y rheolau sy'n berthnasol i salwch, a hynny er mwyn cyflwyno darpariaeth iechyd ddwy haen. Mae'r Cadeirydd hefyd am weld newid arall yn cael ei weithredu er mwyn

egluro'r sefyllfa ynghylch pensiynwyr sydd â salwch ac sy'n sefyll i gael eu hailethol wedi iddynt gyraedd oed ymddeol y Cynllun.

3. Yn dilyn sgwrs gyda William Graham AC, Cadeirydd Ymddiriedolwyr Cynllun Pensiwn yr Aelodau, cadarnhaodd y Bwrdd ei fod yn cytuno â'r newidiadau arfaethedig a chymeradwyodd y newidiadau hyn.
4. Dywedodd y Cadeirydd y byddai'n ysgrifennu at Gadeirydd yr Ymddiriedolwyr i gadarnhau cytundeb y Bwrdd. Bydd y trefniadau ar gyfer newid y rheolau hyn yn cael eu rheoli gan ysgrifenyddiaeth y Cynllun.

Eitem 3: Adolygiad o drefniadau staffio'r Aelodau

5. Bu'r Bwrdd yn trafod yr ymatebion a gafwyd i'r ymgynghoriad a gynhaliwyd mewn perthynas â'r casgliadau dros dro a ddeilliodd o'r adolygiad o drefniadau staffio'r Aelodau a chyflogau staff cymorth yr Aelodau. Nododd y Bwrdd fod consensws eang wedi dod i'r amlwg yn yr ymatebion a gafwyd i'r cynigion a ganlyn:
 - i. cyflwyno codiad cyflog o 1 y cant i holl staff cymorth yr Aelodau, yn unol â'r codiad o 1 y cant ar gyfartaledd a geir ar draws y sector cyhoeddus;
 - ii. sicrhau ei bod yn bosibl i staff cymorth gael adolygiad cyflog ar ôl cyfnod o chwe mis yn dilyn eu penodiad, a hynny er mwyn asesu a fyddai'n bosibl iddynt symud ymlaen i'r pwynt cyflog nesaf yn gynt; a
 - iii. sicrhau bod gan Aelodau hyblygrwydd i hysbysebu swyddi gwag yn fewnol i ddechrau, i'w staff eu hunain, neu o fewn grŵp y blaid, mewn achosion lle y gallai fod ymgeisydd addas ar gyfer y swydd, a bod yr ymgeisydd hwn wedi cael ei recriwtio drwy gystadleuaeth deg ac agored. (Fodd bynnag, byddai'r penodiad yn parhau i fod yn amodol ar gyfweiliad a phroses asesu ffurfiol.)
6. Cytunodd y Bwrdd y byddai'r camau uchod yn cael eu gweithredu ar ddechrau'r flwyddyn ariannol newydd (1 Ebrill 2013).
7. Nododd y Bwrdd yr ymatebion a gafwyd mewn perthynas â phensiynau staff cymorth yr Aelodau a'r hawliau sydd ganddynt mewn perthynas â marwolaeth yn y swydd. Cytunwyd y byddai'r materion hyn yn cael eu hystyried fel rhan o adolygiad y Bwrdd o drefniadau pensiwn Aelodau'r Cynulliad.

8. Cafwyd sylwadau am hawliau gwyliau blynyddol staff cymorth yr Aelodau sydd wedi'u cyflogi ar gontract safonol, a chafodd y Bwrdd geisiadau penodol i aildrafod y mater hwn. Cytunwyd y byddai'r sefyllfa hon yn cael ei hadolygu ac y byddai llythyr yn cael ei anfon at bob Aelod Cynulliad i ofyn am eu barn ar y mater hwn, a hynny er mwyn sicrhau y gallai unrhyw newidiadau, pe baent yn cael eu cymeradwyo, yn weithredol o 1 Ebrill 2013.
9. Cafwyd trafodaeth ar yr ymatebion a ddaeth i law ynghylch cynnig y Bwrdd i wella'r cymorth sydd ar gael i Aelodau mewn perthynas â busnes ffurfiol y Cynulliad (er enghraifft, craffu ar bolisi, deddfwriaeth a chyllid, a datblygu polisi), ac ar gymhlethdod cynnyddol gwaith y Cynulliad. Nodwyd mai croeso petrusgar y cafwyd i'r cynnig hwn. Codwyd pryderon mewn nifer o feysydd, gan gynnwys sut y byddai'r sefyllfa hon yn gweithio yn ymarferol; a fyddai'n bosibl creu cysylltiadau â gweithgareddau sydd ynghlwm â meysydd gwaith eraill yr Aelodau (er enghraifft, gwaith etholaethol); ac a fyddai deiliaid swyddi (fel Gweinidogion a Dirprwy Weinidogion ac ati) yn cael budd o'r math hwn o drefniant.
10. Roedd y Bwrdd yn cydnabod pwysigrwydd mynd i'r afael â'r pryderon hyn, yn ogystal â'r angen i ymdrin â'r berthynas rhwng unrhyw drefniadau newydd a staff grwpiau'r pleidiau. Cytunodd y Bwrdd y byddai angen trafodaethau pellach i ddatblygu manylion unrhyw drefniadau newydd, a gofynnodd am waith ymgynghori pellach, gyda'r nod o wella cadernid y cynnig. Bydd amser yn cael ei dreulio ar y broses o fynd i'r afael â'r pryderon a fynegwyd.
11. Byddai'r Cadeirydd a Sandy Blair yn cynnal trafodaethau manwl ag arweinwyr y pleidiau ac aelodau'r grwpiau cyfeirio yn yr wythnos olynol er mwyn gwneud gwaith ymgynghori pellach.

Eitem 5: Adolygiad Blynyddol o'r Penderfyniad

12. Cadarnhaodd Clerc y Bwrdd fod yr Aelodau wedi cael gwahoddiad i nodi unrhyw faterion a oedd yn peri pryder iddynt y mae'n bosibl y bydd angen eu hadolygu cyn y flwyddyn ariannol nesaf. Er nad oedd unrhyw dystiolaeth ysgrifenedig ffurfiol wedi dod i law, cododd Aelodau unigol a grwpiau y materion a ganlyn â'r Cadeirydd, y Prif Weithredwr a'r Tîm Cymorth Busnes i Aelodau:
 - i. Teithio rhyngwladol: Cytunodd y Bwrdd eisoes i ymestyn y trefniadau ar gyfer teithio rhyngwladol sy'n bodoli ar hyn o bryd yn y Penderfyniad er mwyn galluogi Aelodau i deithio y

tu hwnt i'r Undeb Ewropeaidd, yn amodol ar gyflwyno achos busnes dros wneud hynny. Cytunodd y Bwrdd i ddiwygio'r Penderfyniad cyfredol er mwyn cynnwys y newidiadau hyn ac er mwyn ymdrin â cheisiadau unigol sy'n ymwneud â theithio y tu hwnt i'r UE;

- ii. Lwfans aros dros nos: Yn absenoldeb unrhyw dystiolaeth sy'n awgrymu y dylid newid y drefn hon, cytunodd y Bwrdd i gadw'r cap ar rent, sef £700 y mis, mewn perthynas ag Aelodau y mae eu prif gartrefi wedi'u lleoli yn yr ardal allanol. Fodd bynnag, cytunodd y Bwrdd y byddai'n parhau i adolygu'r mater hwn. Yn ogystal, nododd y Bwrdd ei fwriad i adolygu ei benderfyniad i seilio trefniadau ar ffiniau etholaethol yn hytrach nag ar bellteroedd teithio, fel rhan o'r trefniadau ar gyfer y Pumed Cynulliad.
 - iii. Lwfans costau swyddfa: Gwnaeth y Bwrdd gais am wybodaeth bellach cyn cyfarfod nesaf y Bwrdd a chyn penderfynu a ddylid cynyddu'r lwfans costau swyddfa.
13. Cafodd y Bwrdd lythyr gan y Prif Weithredwr mewn perthynas â chyfeiriad trafodaethau'r Comisiwn ar gyfer y dyfodol. Cytunodd y Bwrdd i ymateb i faterion sy'n ymwneud a strategaeth TGCh y Comisiwn pan fydd rhagor o fanylion ar gael. Yn ogystal, nododd y Bwrdd ei gytundeb blaenorol i barhau i adolygu'r lwfans gofawyr ac i egluro'r darpariaethau yn y Penderfyniad sy'n caniatáu ystyried darparu cymorth ychwanegol o dan amgylchiadau arbennig.
14. Cymeradwyodd y Bwrdd gais y Prif Weithredwr i ymestyn y rhestr o eitemau y caniateir gwario arnynt wrth rentu eiddo wedi'i ddodrefnu, a hynny er mwyn cynnwys trefniadau diogelwch. Fodd bynnag, eglurodd y Bwrdd y dylai hyn ond ddigwydd mewn achosion lle mae'r mater diogelwch o dan sylw yn gysylltiedig â statws yr Aelod fel cynrychiolydd etholedig, a lle mae'r heddlu wedi argymhell cyflwyno trefniadau o'r fath.
15. Cymeradwyodd y Bwrdd gais y Prif Weithredwr ynghylch sicrhau bod y Penderfyniad yn adlewyrchu Cynllun Rheoli Amgylcheddol y Cynulliad, a nododd y Bwrdd y gwahoddiad a gafwyd gan y Prif Weithredwr i adolygu'r trefniadau fframwaith mewn perthynas ag anghenion nwyddau swyddfa a llungopïo yr Aelodau, yn ogystal â'r cyfyngiadau sy'n bodoli ar hyn o bryd mewn perthynas ag aros mewn gwesty. Fodd bynnag, yn

**absenoldeb unrhyw geisiadau penodol gan Aelodau'r Cynulliad,
penderfynodd y Bwrdd beidio â gwneud unrhyw newidiadau i'r
trefniadau hyn ar hyn o bryd.**

**Cadarnhawyd y byddai'r Bwrdd yn cynnal ei gyfarfod nesaf ar 22 Mawrth
2013.**

**Ysgrifenyddiaeth y Bwrdd
Chwefror 2013**